

CACHET APTEEK
 U Plus Aptek
TOMSTRAAT 92
Tel. 4201
 Groot genoeg om u te dien, klein genoeg om u te ken

die WAPPAD
 IN U LIG SIEN ONS DIE LIG
 AMPTELIKE STUDENTEKOERANT VAN DIE P.U. vir C.H.O.
JAARGANG XXXIV **NOMMER 8** **23 MAART 1979**

TOPS
 Uitsig Deurloop
 Tel. 21112
 VIR: Rekenaars
 Witjasse
 Dissekteerstelle

 Skoonheidsmiddels

 Geskenke

ASB- en NUSAS-leiers praat saam

- 'N BESKOUIING DEUR ESTELLE OOSTHUIZEN

Theuns Eloff het verlede week vir die eerste keer as 'n ASB-president die geleentheid gekry om studente van Wits op 'n massavergadering toe te spreek.

In die Great Hall op die Wits-kampus het mnr. Eloff en die president van NUSAS, mnr. Auret van Heerden (van UK), die studente toegesprek oor die Afrikaanse en Engelse student se onderskeidelike plek, rol en houding in en teenoor die gemeenskap.

In sy toespraak het mnr. Eloff probeer om by die Engelse student 'n beter begrip te kry vir die Afrikaanse student en sy reaksie op die samelewing. Hy het die Christelik-Nasionale agtergrond van die Afrikaanse student, en sy opgroei in die oorbekermende atmosfeer van 'n regse regeringsgesinde pers en 'n baie nou party politieke agtergrond geskets.

"Die Afrikaanse student het nog nooit nodig gehad om dinge in die samelewing te bevraagteken of kritiek te lewer oor sy samelewing nie", het Theuns gesê. "Die hoop word egter uitgespreek dat die stand van sake sal verander namate die Afrikaanse student deur liggame soos die ASB bewus gemaak word van sy rol in die samelewing."



Mnr. Theuns Eloff, die president van die ASB

Theuns het gesê: "Die feit dat die Afrikaner nie sy lewens- en wêreldbeskouing segmenteer nie, maar multi-lateraal reageer op alle vlakke

van die samelewing (onder andere sy kulturele, ekonomiese, politiese en godsdienslike siening), maak hom anders van die Engelse student".

Theuns het ook die rol wat die ASB in die politieke en kulturele vorming van die Afrikaanse student speel, onderstreep. Hy het gesê: "Die ASB wil onder andere hê dat die Afrikaanse student meer bewus gemaak moet word van sy gemeenskap sodat hy meer krities daarteenoor kan staan".

Hy het verwys na die aard van die Afrikaner wat hom deur die loop van die geskiedenis (twee vryheidsoorloë, die 1914 Rebelle, 1922 mynwerkerstaking, Sharpsville-1961 en Soweto-1976) as baie doelgerig en standvastig bewys het.

Theuns het 'n waarsku-



Mnr. Auret van Heerden, die president van NUSAS.

wing aan die Engelse student gerig om die Afrikaanse student nie te forseer in 'n rigting waarheen hy nie wil gaan nie.

Dele van die gehoor was uiters simpatiek en het telkens, ter ondersteuning van Theuns, hande geklap.

Mnr. Auret van Heerden het positiewe erkenning aan Theuns gegee. Hy het gesê die Engelse studente het waardering vir die onskuld, naiwiteit, eerlikheid en goeie voornemens waarmee die ASB die politieke sfeer betree het.

Mnr. Van Heerden het egter telkens met uitlatings oor die ASB heeltemal van die onderwerp af. Die Engelse student en NUSAS in die Suid-Afrikaanse samelewing, afgedwaal en hom ongevraagd uitgelaat oor 'n punt wat glad nie ter sake was nie.

Hy het verder gemeld dat NUSAS baie meer gehard is as die ASB aangesien dit makliker vir Engelse studente is om die foute te besef en kritiek uit te spreek oor onder andere die apartheidbeleid en die Suid-Afrikaanse universitêre sisteem.

"Die belangrikheid wat die joernalistiek of 'n regsberoep of die forum van studente-wees aan die Engelse student bied om verandering te propageer, moet nooit onderskat word nie," het mnr. Van Heerden gesê. Hy sê die Engelse student moet te alle

tye veg om nie uit die drie hiper-belangrike sferes geskop te word nie. Mnr. Van Heerden het ter staving van sy punt die volgende statistiek aangehaal: 4 000 mense is gedurende die eerste vyftien dae van Januarie in Johannesburg alleen volgens die paswet in hegtenis geneem. Sulke en soortgelyke alledaagse gebeurtenisse, sê hy, skreeu om hervorming.

Aan die einde van sy toespraak het mnr. Van Heerden gesê die onvergeeflike van die ASB is dat hy steeds die behoud van 'n rassistiese regering wat 'n vernederende en verfoeilike beleid oor tuislande en trekarbeid handhaaf, voorstaan.

Dele van mnr. Van Heerden se toespraak is minder goed deur die studentemassa ontvang.

Die vrae na die afloop van die twee toesprake was almal aan mnr. Eloff gerig en was van so 'n uitdagende aard dat mnr. Eloff alle krediet verdien vir die ferme, kalme en redelike wyse waarop hy die vrae beantwoord het.

Na afsluiting van die vergadering het baie studente persoonlik met Theuns kom gesels en hom uitgevra oor die aard van die ASB en die ASB se standpunt oor sekere aangeleenthede.

Henderson bekommerd oor druipsyfer

Prof. D.S. Henderson, die rektor van Rhodes Universiteit, het baie duidelik laat blyk dat die 55 persent slaagsyfer van die studente in Suid-Afrika, hom nie baie aanstaan nie. As dit vergelyk word met die 80 persent slaagsyfer van die mediese skole, is dit nog slegter.

Die oplossing wat prof. Henderson aanvoer, is dat die regering studente glad nie moet subsidieër nie, maar dat die regering aan studente lenings moet toestaan. Indien 'n betrokke student sy graad nie binne drie jaar verwerf nie, is hy verplig om die lening terug te betaal.

Hierdie voorstel kan groot besparings vir die land inhou, veral in die huidige ekonomiese klimaat. Soos prof. Henderson die saak gestel het, blyk dit 'n baie billike voorstel te wees, maar prof. Tjaart van der Walt het egter ten opsigte van 'n paar punte probleme met só 'n voorstel geopper. Een van die belangrikste probleme is dat universiteite studente gaan probeer trek om geld in die hande te kry. Die voorstel kan egter baie geslaagd wees indien hierdie probleem uitgeskakel kan word.

Dr. Steyn het die logika agter staatsubsidies verduidelik en 'n belangrike punt wat hy genoem het, is dat die

staat gepoog het om die verhouding tussen studente en dosente so laag as moontlik te hou. Die ideaal is tien tot vyftien studente per dosent.

Hierdie poging het ontstaan ná die studente-opstand van 1965, waar die studente se grootste klag die onpersoonlikheid van die universiteite en dosente was. Hy het die moontlikheid van 'n kompromie tussen die huidige stelsel en die voorstel van prof. Henderson in die vooruitsig gestel.

By al drie die sprekers het die idee om meer verantwoordelikheid aan studente toe te ken, na vore gekom.

Alhoewel die vergadering vir studente gereël is, is dit swak deur studente bygewoon. Uit die ongeveer dertig teenwoordigers was minder as die helfte studente.



Prof. D.S. Henderson (links) wat as spreker opgetree het by 'n vergadering van die Akademiese Raad oor staatsubsidies. Prof. Tjaart van der Walt sit regs.

TERUGGENEEMDE VOORRAAD

Voetstoots en kontant

Besigtig Rossstraat 14, Potchefstroom Industrie

1 x Kasset speler	R15,00
1 x Philips freeway kar radio	15,00
1 x Philips stereo kasset speler	79,00
2 x Philips freeway kasset speler	18,00
1 x Sharp kar radio	39,00
1 x FM kar radio	20,00
1 x Radiohorlosie nuut	39,00
1 x Stereo Hoëtroubanddek	99,00
1 x Stereo Hoëtroustel	199,00
1 x Pioneer Hoëtroustel	499,00
1 x Wekker	3,95
1 x Elektroniese rekenaar	5,00
1 x Elektroniese rekenaar (met alle funksies)	19,00
1 x FM Dra radio	16,00

ALLI'S

Winkel no 29, Indiërsentrum, Tel. 3810.

AR WIL STANDAARD VERBETER

Die nuwe struktuur van die Akademie Raad is geïmplementeer met die doel om die akademiese standaard van die PU te verhoog.

Die Akademie Raad het op die oomblik twee ondervoorsitters, mnr. Louw van Biljon, voorsitter van die Verenigingskomitee, en mnr. Nico Lemmer voorsitter van die Inter-fakultêre komitee. Al die verenigings van die AR ressorteer nou onder die Verenigingskomitee terwyl die klasverteenvoerders onder die Interfakultêre komitee ressorteer.

Die taak van die klasverteenvoerders is om die kommunikasie tussen student en dosent te vergemaklik. Wedersydse probleme kan deur middel van die klasverteenvoerders opgelos word. Klagtes soos byvoor-

beeld die swak klasbywoning, swak doseermodes en die tempo en hoeveelheid van werk kan van beide kante met die klasverteenvoerders opgeneem word. Dit sal ook die klasverteenvoerders se plig wees om praktiese dinge soos die uitdeel van toetsboeke en die neem van presensie te behartig en om seminare te lei, studiestukke op te stel en handboekbestellings te kontroleer.

Elke departement se klasverteenvoerders sal op die betrokke Departementele komitee sitting hê. Die voorsitter van die Departementele komitee het sitting op die Fakulteitskomitee, en die Fakulteitsvoorsitter het sitting op die AR as lid van die Interfakultêre komitee.

Daar is reeds 'n denkskrum in samewerking met dosente (in hul private hoedanigheid) deur die AR gehou. Volgens mnr. K. Viljoen, voorsitter van die AR, bestaan daar onder sekere dosente die wanindruk dat die studente probeer om drukgroepe te vorm. Die struktuur is vlg. mnr. Viljoen egter daargestel om samewerking tussen dosent en student op 'n georganiseerde manier te bewerkstellig.

SACLA Konfereer

'n Weeklange Christen-leierskapskonferensie word gedurende die Julie-vakansie in Pretoria gehou. Christene vanuit alle kulturele, denominasionele en rasse-groepe gaan hieraan deelneem.

SACLA, die Suid-Afrikaanse Christen-leierskapsbyeenkoms, was 'n eenmalige byeenkoms en het nie ten doel om 'n nuwe kerk in Suid-Afrika tot stand te bring nie. Op 6 Maart het 'n SACLA-

koördineringskomitee op die PU-kampus vergader. Die vergadering is deur verteenwoordigers van die Hervormde Teologiese Studentevereniging, Teologiese Studentevereniging, die

AGS - Studentevereniging, die Korpsraad, die Wysbegeerte vereniging en 'n aantal individuele Christene bygewoon.

Die doel van die koördineringskomitee is hoofsaaklik om SACLA bekend te stel, en om die registrasie en vervoerreëlings na die SACLA-konferensie te tref.

Die konferensie word van 8 tot 15 Julie op die Pretoriase Skougronde gehou. Konferensiegangers sal 'n registrasiefout van R25 moet betaal. Subsidies is beskikbaar vir diegene wat nie die middele tot hulle beskikking het nie.

Christene wat meer inligting aangaande SACLA verlang, kan mnr. Pieter Fourie tussen 13h00 en 14h00 by die SSR-kantoor kontak.

STUDENTE BESKOU MARXISME

'n ASB-Wysbegeerte Konferensie met die tema, *Marxisme - Strominge en Invloede*, is Saterdag 17 Maart op die kampus van die PU aangebied. Mnr. P.J.J. van Veuren van RAU en P.J.J.S. Potgieter van die PU het as gassprekers opgetree en studente van UP en RAU het ook die geleentheid bygewoon.

Mnr. Potgieter, verbonde aan die Departement Staatsleer aan die PU se referaat het gehandel oor *Die Betekenis van die Marxisme vir Suid-Afrika Vandag*. Hy het genoem dat Marxisme soos wat dit vandag in Sowjet-Rusland bedryf word, feitlik niks meer ontleen aan die klassieke ideologie van Marx en Engels nie, maar dat die Russiese Sowjet-kommunisme in die twintigste eeu onder die invloed van Lenin en Stalin in 'n ontbindingsproses wat gemik is op imperialisme en ekonomiese mag, ontlaar het.

Mnr. Potgieter het gesê dat hy hom distansieer van die nuwe siening dat kapitalisme en demokrasie as enigste alternatiewe vir die Marxisme gestel word, aangesien die aanslag nie bloot ideologies van aard is nie, maar eintlik op ekonomiese en militêre vlak lê.

Hy is egter van mening dat ons vandag in S.A. te doen het met Marxisme as ideolo-

Affikampus INTERUNIVERSITÊRE REDAKSIE

THEUNS ELOFF SPREEK TUKKIES TOE

Mnr. Theuns Eloff, die ASB-President, het tydens 'n massavergadering die TUKS-studente toegesprek oor die ASB.

Die hooftema van mnr. Eloff se toespraak was waarom en in welke mate Afrikaanse studente betrokke moet wees by die ASB.

Die redes wat deur mnr. Eloff aangevoer is vir die noodsaaklikheid van studentebetrokkenheid, was dat die ASB slegs deur studentebetrokkenheid 'n forum kan wees vir die Afrikaanse student om sy standpunt te stel en ook wakker geskud kan word om sy taak raak te sien en sy deel te doen. Die leiers van môre studeer tans aan universiteite en kolleges en hulle betrokkenheid by 'n belangrike Afrikaanse studentekultuurorganisasie is van die uiterste belang.

Die Afrikaanse student besef nie altyd sy rol in die kritieke Suid-Afrikaanse situasie nie, daarom moet hy by die ASB betrek word sodat hy gelei word om te help soek na 'n vreedsame oplossing vir die Suid-Afrikaanse vraagstukke. Die positiewe sy van die Inligtingsdebakel is dat dit die oë van die Afrikaanse student geopen het vir die feit dat ons regering ook gewone mense is wat menslike foute kan begaan.

"Krities gebalanseerd" is die sleutelwoorde wat studentebetrokkenheid moet beskryf. Die student moet met sy hart sowel as sy verstand dink. Die lees van berigte en artikels oor die ASB in beide die studente- en nasionale pers kan baie bydra tot die student se vorming en leiding betreffende studentepolitiek.

Deur betrokkenheid by die kulturele aksies soos Fiësta

en Kuesta en politiese aksies (die lees van ASB-publikasies oor onder andere Kruispad en rassisme) word die Afrikaanse student op die pad na selfdenkendheid en volwassenheid oor die hele spektrum van sy lewens- en wêreldbeskouing (ekonomies, politiek, kultureel, ideologies en opvoedkundig) gelei.

Die kwessie van affiliasie en disaffiliasie het ook ter sprake gekom en mnr. Eloff het gesê dat die huidige stelsel slegs as oorgangsfase tussen die algemene affiliasie van die verlede en positiewe affiliasie van die toekoms, dien.

Die onderwyskolleges voel blykbaar dat daar te veel politiek in die ASB gepraat word. Mnr. Eloff se standpunt hieroor is dat die ASB as 'n Afrikaanse studentorganisasie 'n geïntegreerde aard moet hê. Politiek, sport, ekonomie en opvoeding is almal saam verweef in die oorkoepelende kulturele doel van die organisasie. Geen- een is losmaakbaar van die

ander nie. 'n Duidelike onderskeid word egter gemaak tussen politieke betrokkenheid en party-politieke propaganda.

Die vrae wat vervolgens aan mnr. Eloff deur die Tukkie gestel is, het gehandel oor die taak van die ASB waarop mnr. Eloff geantwoord het dat daar twee vlakke in die taak onderskei kan word, naamlik eerstens om kennis weer te gee aan die studente oor aktuele sake (byvoorbeeld Kruispad en rassisme) en tweedens om studente van hulle politieke pligte bewus te maak.

'n Verdere vraag wat opgeduik het, was hoe verteenwoordigend die ASB werklik is. Mnr. Eloff se antwoord hierop was dat die Nasionale Party en NUSAS maar met dieselfde probleem te kampe het. Daar is genoegsame publisiteit aan disaffiliasie verleen om studente daarvoor in te lig. Die ASB beskou homself gevolglik verteenwoordigend in soverre die studente wat nie gedisaffilieer het nie, hom by implikasie steun.

AFFIKAMPUS FLITS

● Die veelbesproke SR-lid van Wits, mnr. Dan Roodt, se jongste uitspraak oor die SR van Wits lui as volg:

"If our SRC is really representative; we have the dullest most mentally pedestrian campus in entire South Africa."

(UIT: MNR. ROODT SE KULTURELE AANGELEENTHEDE VERSLAG SOOS AANGEHAAL IN WITS STUDENT 5 MAART 1979)

ENGELSE STUDENTE RAAK MEER BETROKKE

Kommentaar deur Estelle Oosthuizen.

Iets wat 'n mens dadelik opval na die onlangse besoek van mnr. Theuns Eloff, ASB-president aan onderskeidelik die WITS- en TUKS-kampusse is die diepliggende fundamentele verskille wat daar tussen die twee studentegemeenskappe is.

Die betrokkenheid van die Engelse student in teenstelling met die byna belangeloosheid van die Afrikaanse student is die eerste teer puntjie. Die Great Hall op die Wits-kampus was ongeveer sewe-agtstes vol toe mnr. Eloff, die ASB president, en mnr. Auret van Heerden, die NUSAS-President, Dinsdag 13 Maart 1979 hulle onderskeie toesprake daar gelewer het.

Op die TUKS-kampus dieselfde aand, was die prentjie heel anders. Die saal in die Kanseliersgebou was te groot vir die handjievul studente wat opgedaag het. Gevolglik is die vergadering na 'n kleiner lesingsaal verskuif... en dit nogal met 'n massavergadering waar die kandidaat vir die SSR-tussenverkiesing hulle standpunte gestel en deur die studentemassa met vroege gepeper kon word. Die apatiese houding van die studentemassa van Tuks, is regtig betreurenswaardig.

Die aard van die vrae en die tempo waarmee die vrae aan mnr. Eloff gestel is na afloop van sy toespraak, het weereens die verskille tussen die twee studentegroepe beklemtoon.

By WITS was die vrae meestal van 'n beleidsaard en die standpunt van die ASB oor sekere aktuele sake. Nadat die vergadering verdaag is, is die geleentheid aan studente gebied om persoonlik vrae aan mnr. Eloff te kom stel. Die reaksie was verrassend. Mnr. Eloff het hom met moeite later verskoon om 'n eteafspraak met die WITS-Studenteraadvoorsitter en 'n paar studenteraadslidde na te kom.

Die vrae wat die Tukkie gevra het was meestal oor die aard van die ASB en ander organisatoriese sake. Slegs vier vrae is aan meneer Eloff gestel.

Is die houding van die Tukkie nie dalk weerspieëlend van al die Afrikaanse universiteite se belangeloosheid nie? Dit sou dalk goed wees vir die Afrikaanse studente om vir eenmaal hulle kritiek oor die Engelse universiteite vir 'n oomblik te laat staan en die positiewe van hulle studentebetrokkenheid raak te sien en daaruit te leer.



Stoker word tagtig

Op Donderdag 29 Maart sal die Stokerlesings wat jaarliks aan die PU gehou word, plaasvind. Prof. H.G. Stoker word vanjaar 80, en daarom beplan die organiseerders 'n jubileumviering.

Dr. J.A. Heyns sal oor enkele aspekte van Calvinisme praat. Hierna sal die gebruiklike paneelbespreking gehou word.

Die dinee sal die vorm van 'n aansitete aanneem. Studente betaal R1,50 en dosente R3,00.

Studiekring gehou oor identiteit

Studiekring bied op Maandag 26 Maart om 19h00 'n vergadering in die Senaatsaal aan. Mnr. Theuns Eloff sal oor die ASB-tema, *Identiteit - myne en joune*, praat.

Dit is 'n oop vergadering en alle belangstellendes is welkom.

Hempies nog beskikbaar

Karnaval '79 T-hempies is nog teen R3,50 by die Puk-Pik te koop.

Kaartjies vir rugbydag

Vervoer word vir die rugbydag wat by Wits gehou word, gereël. Kaartjies, wat drie rand kos, kan by die SSR-kantoor bespreek word. Die busse vertrek om 10h00 en keer ná die wedstryd terug. Toegangskaartjies vir die wedstryd beloop een rand en is ook by die SSR-kantoor beskikbaar. Geen drank sal op die terrein toegelaat word nie.

Besembosredakteur gesoek

Daar is 'n vakature vir 'n Besembosredakteur - aansoeke word ingewag vòòr Vrydag, 30 Maart 1979, in die bussie van Anne-Marie Jacobs in die Studenteraadskantoor.

Swartman oor SACLA

Vusi Khanyile, 'n voormalige ondervoorsitter van die Universiteit van die Noorde, praat Maandag, 26 Maart, om 20h00 in die Geografiesaal oor die betekenis van SACLA vir die Swartman.

Weerbaarheid beoog

Die weerbaarheid van die Universiteit en hulpverleningswerk gaan uitgebou word.

Mnr. Gert Breed wat die portefeulje Weerbaarheid op die SSR beklee, sê dat daar in elke koshuis 'n HK-lid is vir weerbaarheid.

Volgens mnr. Breed gaan 'n draakklub vir dames gestig word. Dames wat nie aan sport deelneem nie of sommer net lus voel om soggens 'n ent te gaan draf, kan hulle KH-lid vir weerbaarheid kontak. Dit gaan suiwer om

ontspanning en algemene fiksheid en is nie ingestel op kompetisie nie.

Daar gaan 'n pistoolklub vir mans gestig word. Belangstellendes moet hul HK-lid vir weerbaarheid kontak. Daar is alreeds 'n pistoolskietklub vir dames. Hulle oefen Maandae en Donderdae.

Onder dr. N.J. Tiedt, 'n

nuwe dokter by KMD, gaan daar nou van opgeleide personeel gebruik gemaak word om noodhulp op die kampus uit te bou. Die noodhulp sal onder KMD ressorteer. Mnr. N. Kotze van die studenteburo sê studente wat reeds opleiding ontvang het kan daarmee help.

Maj. du Toit van Sekuriteit het gevra dat 'n noodspan uit die studente saamgestel



Mnr. Gert Breed, SSR-lid vir Weerbaarheid

moet word. Hierdie noodspan sal in die dorp kan help tydens 'n noodtoestand. Hulle sal onder andere in tye van nood kan help met verkeersregulering en noodhulptoediening. Mans en dames sal opgelei word en belangstellendes moet nie kwalifikasies te hê nie.

Vir die dames gaan daar in samewerking met die weer-mag 'n kursus in radiobeheer aangebied word. Dames kan vir mnr. Gert Breed kontak in die verband.

Enige navrae in verband met weerbaarheid en belangstellendes in enige van bogenoemde sake kan of hulle HK-lid vir weerbaarheid of mnr. Gert Breed, SSR-lid vir weerbaarheid kontak.

Koshuispersoneel kry dalk Sondae vry

'n Moontlikheid dat daar voortaan nie meer Sondagoggende en Sondagaande in die eetsaal geëet gaan word nie, word ondersoek.

Die koshuisbeheerkomitee het 'n komitee van ondersoek aangestel om die moontlikheid van kafeteria-etes te ondersoek in die plek van die aansittes saans.

Mnr. Gert Breed, voorsitter van die Koshuisraad, is ook op die kommissie aangestel. Hy sê dat die aandgoddiens by sommige koshuise dan uitgeskakel sal word.

Mnr. Breed sê dat die moontlikheid van geen etes in koshuiseetsale op Sondagoggende en -aande ondersoek word. Dit word beoog sodat die matrones en ander betrokkenes Sondae kerk toe kan gaan. Sondagoggende en -aande sal daar dan in die koshuise tee en beskuit of vleispasteitjies bedien word.

Die moontlikheid dat die skoonmaak van koshuise op Sondae gestaak gaan word, word ook ondersoek. Mnr. Breed sê dat ons 'n Christelike Universiteit is, maar dat die bediendes en matrones op Sondae presies dieselfde werk as in die week doen. Die skoonmaak van koshuise op Sondae is nie nodig nie -

hulle kan korter ure werk en ook kerk toe gaan.

Die Koshuisraad wil ook die primari en primariae beter aan die massa bekendstel. Dit sal gedoen word deur waar die massa in groot getalle saamgetrek is bv. oriëntering, hulle bekend te stel. Die primari sal ook voortaan die koshuisvergaderings van ander koshuise bywoon. Dit word gedoen om waar die koshuise mekaar goed opgekeil het in Karnaval en ook op die sportveld met mekaar wedywer, tog aan 'n eensgesinde en gesonde PU-gees te bou.

Op die vorige koshuisvergadering het die primari en primariae mondelings verslag gedoen oor oriëntering. Die aanbevelings en wenke sal aan die adjunk-voorsitter van die SSR voorgelê word.

Ook sal 'n verslag oor die Karnaval aan die Karnaval-komitee voorgelê word waarin aanbevelings gedoen en probleme in verband met die Karnaval genoem sal word.

Rusland begin nie in 1917

Mnr. Leno Rust, 'n navorsingswetenskaplike aan die Sentrum vir Internasionale Politiek, het gedurende 'n etensuurbyeenkoms van die Sentrum op 6 Maart, 'n referaat oor die geskiedenis van Rusland gelewer.

Volgens mnr. Rust is 'n historiese onderbou nodig om die huidige sinvol te hanteer. Daar loop 'n goue draad deur die Russiese geskiedenis wat 'n mens van die begin af kan deurneem. Die geskiedenis van Rusland begin nie in 1917, soos baie mense dink nie. Die Rooi Revolusie van 1917 het wel 'n nuwe dimensie aan die buitelandse beleid van Rusland gegee,

maar dit het nie 'n radikale verandering teweeggebring nie.

Onder Iwan die verskriklike (Iwan IV), die eerste Tsaar van Rusland, het die grondgebied van die land geweldig uitgebrei. Reeds hier kan die ekspansiedrang van die Russe duidelik gesien word.

Pieter die Grote wou uit Europa neem wat goed is en Rusland daarop bou. Kathe-

rina die Grote het bygedra tot die verdere gebiedsuitbreiding van Rusland.

Rusland het ook na die Ooste uitgebrei. In 1860 het hy beheer oor Wladiwostok verkry. Die Trans-Siberiese spoorlyn is in 1890 gebou. Daarby het Rusland ook die reg verkry om 'n spoorlyn deur Mantsjoerye, tot by Port Arthur, te bou. Hiermee is die lank gekoesterde ideaal van 'n ysvrye hawe verwesenlik.

In die negentiende eeu het die tsaar met ernstige binne-landse probleme te doen gekry. Die Russe was agterlik en hulle het die begeerte gehad om te verbeter. Daar was allerlei revolusionêre strominge en 'n gevoel van Pan-Slawisme het geheers.

Uit die politieke chaos wat voor die Eerste Wêreldoorlog geheers het, kan die tsaar nie orde skep nie. Op 1 Augustus 1914 het Rusland oorlog teen Duitsland verklaar. Sy bondgenote moes hom ekonomies en andersins steun. Die Russiese soldate was ongemotiveerd en onpatrioties weens die kommunistiese propaganda.

In Maart 1917 het Tsaar Nikolaas II ten gunste van Alexander Kerenski geabdikeer. In November 1917 het die Kommuniste die land oorgeneem en die vernederende Vrede van Brest-Litowsk is met Duitsland gesluit.

Onder kommunistiese bewind het Rusland van krag tot krag gegaan. Die land het tegnologie ontwikkel en geïndustrialiseer geword.

Rusland se sukses in die Tweede Wêreldoorlog is te danke aan sy duidelik omlynde oogmerke. Dit is ondersteun deur Hitler se strategiese foute en Rusland se Westerse bondgenote se kortsigtigheid.

Die Tweede Wêreldoorlog het Rusland se ekspansiedrang momentum laat kry. Dit is verder versterk deur die Kommunistiese ideologie, wat 'n stewige fondament is vir uitbreiding en aggressiwiteit.

Rusland se strewe na wêreldoorheersing gaan vandag nog voort, alhoewel dit telkens by veranderde omstandighede aangepas word.

FIESTA IS VANJAAR OP RAU

Fiesta, ASB se studentefees, word vanjaar vanaf 31 Mei tot 2 Junie op die kampus van die Randse Afrikaanse Universiteit aangebied.

Die program sluit voorlopig die volgende kursusse in:

- Valskermspring
- Pistoolskiet
- Dans ("Ballroom" sowel as "Disco")
- Binneshuisversiering
- Ken-jou-wyn-en-tabak
- Muurbal en Golf (Gevorderde afrigting duur twee dae, kampioenskappe op die derde dag).
- Fotografie
- Bak-'n-brou en Onthaalkuns
- Macramé
- Radiowerk ("Citizen Band", tweerigtingradio's en installering)
- Motorherstelwerk
- Blommerangskikking en Batik
- Klere-ontwerp

Minstens tien studente per kampus moet in 'n kursus belangstel voordat dit aangebied word. Dit is dus noodsaaklik dat studente in groot groepe inskryf om te verseker dat sy kursus aangebied word. Dit is moontlik vir 'n student om vir twee kursusse in te skryf.

Daar sal tot 28 Maart 'n lys in die SSR-kantoor wees waarop belangstellendes hulle name kan aanbring. Sodra die lys van die verskillende kampusse gein is, sal bekendgemaak word watter kursusse aangebied sal word, en hoeveel die inskrywingsfooie en ander kostes sal bedra.

Tweedejaarskamp was suksesvol


'n Suksesvolle tweedejaarskamp is van 16 tot 18 Maart deur 42 eerstejaars van die PU bygewoon.

Die temas wat bespreek is, het die volgende onderwerpe ingesluit:

- Tweedejaar en Pukwees
- Die oplossing van 'n oorlewingsprobleem
- Groepsdinamika
- Tweedejaar en kampusstruktuur

• Tydsindeling, besteding en benutting

Daar is ook 'n bespreking oor aborsie gehou. Die Bybelstudie het ghandel oor Johannes. Die kampgangers het gesamentlik bygedra tot die kerkdiens op Sondag.



DIE MEESTE BANKTYD VIR DIE BESIGE STUDENT

Weekdae 8 vm. - 4.30 nm.
(Woensdae ook)
Saterdag 8 vm. - 11.30 vm.

Dit is 13½ uur meer per week — so goed soos 1½ dag ekstra elke week.

Ons bestuurder, mnr. G. W. Smit, nooi studente vir 'n koppie tee of koffie by ons



Mnr. G.W. Smit

gerieflik geleë kantoor by Esselenstraat 7, (Die Bult) Potchefstroom. Tel. 4626. Spesiaal ontwerpte knipbord-vouers is gratis beskikbaar aan Trust Bank-spaarrekeningklieënte. Ons bied ook alle bouverenigingdienste.



Daar wag 'n nuwe wêreld vir u by Die Trust Bank.

ASB-SAAK OP WITS GESTEL

Die beter kontak wat deesdae tussen Afrikaners en Engelse bestaan, is weer bewys deur die blote feit dat die ASB-president, mnr. Theuns Eloff die geleentheid gegun is om op Wits oor die Afrikaanse student te praat. Dit is dan ook interessant dat die onderwerpe juis oor die Afrikaanse en Engelse studente gehandel het.

Die positiewe gees waarin mnr. Eloff op die kampus ontvang is, getuig van die openheid van die Engelse student oor die standpunt van andere - iets wat by sommige Afrikaners ontbreek. Mnr. Eloff het ook baie vrae ontvang - 'n bewys dat die Engelse student graag meer oor die Afrikaner en sy denke wil weet en wel oop is vir oortuiging.

Dit is dan ook verblydend dat die ASB iemand soos mnr. Eloff aan die roer van sake het wat die saak van die Afrikaanse student dinamies en oortuigend kan oordra.

Dit is jammer dat mnr. Auret van Heerden hom nie daarvan kon weerhou om kritiek oor die ASB te lewer nie. Dit was onvanpas - hy was veronderstel om oor die Engelse student en sy rol in die samelewing te praat.

Dit is aanmatigend van mnr. Van Heerden om te beweer dat die Engelse student meer gehard is as die Afrikaner en makliker foute kan besef en kritiek uitspreek. Foute is 'n relatiewe begrip: dit hang af van die maatstawwe wat 'n mens gebruik om daad aan te meet - en verskillende mense se maatstawwe is nie dieselfde nie. Bowendien dink ek dat die Afrikaanse student se beginsels in die algemeen op vaster basis staan: hy staan immers daarvoor bekend dat hy 'n Christen is en dus sy maatstawwe uit die Bybel put. Die Afrikaner sal weer foute in die Engelse samelewing makliker kan uitken as die Engelsman self.


Die ASB staan ook nie die behoud van 'n rassistiese regering voor nie. Al weerspieël die ASB-studiestukke nie die amptelike ASB-standpunt nie, kan dit tog 'n aanduiding wees van die denke van die Afrikanerstudent. Dan word dit onverstaanbaar dat mnr. Van Heerden ná die studiestuk oor rassisme nog kan dink dat die ASB 'n rassistiese regering steun. Hierdie studiestuk het bewys dat die Afrikaner die foute in sy samelewing kan herken en die behoefte voel om iets daaraan te doen.

Al sal die ASB en NUSAS seker nooit dieselfde oor die politiek dink nie, kan meer kontak - soos die byeenkoms op Wits - net help dat die twee partye mekaar beter verstaan, hopelik met respek en begrip vir die ander se standpunt.

STUDENTE ONBETROKKE BY EIE BELANGE

Die aksie wat deur die Akademiese Raad gereël is waartydens verskeie hoogaanstaande persone hul standpunte oor die afskaffing van universiteitsubsidies gestel het, is swak deur studente bygewoon. Dit is jammer dat die breë student so onbetrokke is by sy eie belange. Die byeenkoms was goed georganiseer, die onderwerp prikkend en aktueel en goeie reklame is gemaak. Dit laat die swak bywoning soveel skerper afsteek. Daar mag goeie redes voor wees: die feit dat dié aksie so kort na die Karnaval gehou is, kon moontlik meegebring het dat die studente eerder akademies verkeer het as om nog 'n aand aan ander dinge af te staan. Dit neem egter nie weg dat hierdie saak tog prioriteit moes geniet het nie. Dit het juis, in teenstelling met baie ander aksies wat goed bygewoon word - oor die kern van studentwees gehandel. Die toekoms van die student het ook ter sprake gekom. 'n Mens kan maar net hoop dat 'n herhaling van so 'n opset nie gou weer voorkom nie.

Wits: "Ons kyk . . . en wag"



Theuns Eloff het op die Wits-kampus meer vertroue in en steun vir die Afrikaanse student en ASB se standpunte gewen.

WESTE DOEN NIE HUISWERK

deur Dirk van Heerden

Skrap uit wat nie pas nie: dit wil 'n mens graag vra van wie ook al nou die leier in die samesprekings oor die onafhanklikheid van SWA/Namibië is.

Die lys waar uitgeskrap moet word is dan ook as volg: Suid-Afrika; VSA; Brittanje; Frankryk; Wes-Duitsland; Kanada; Swapo; Angola; Botswana; Mosambiek; Tanzanië; Zambië; Vier SWA-partye nl. DTA, NNF, Swapo-D en Aktur.

Bogenoemde lande en partye is almal uitgenooi na die samesprekings in New York oor die implementering van die skikkingsplan vir die onafhanklikheidswording van SWA/Namibië. Die "egte" SWA-partye - DTA, NNF, Swapo-D en Aktur is eers ter elfder ure op versoek van mnr. Pik Botha, Minister van Buitelandse Sake, na die samesprekings genooi.

Altesaam elf lande en vyf partye neem aan die samesprekings deel en hulle sal die besluite neem. Is so baie groepe nodig? Per slot van sake is dit SWA wat onafhanklik raak. Dit is Suidwesters, wat hier woon. Hulle moet tog besluit, wit en swart. Of moet buitelanders dan besluit hoe en wanneer hulle onafhanklik sal raak?

Met die onafhanklikheidswording van Mosambiek, Angola en ander Afrika-state het hulle grootliks self besluit. En hulle kry internasionale erkenning. Hoe het hulle onafhanklikheidsproses egter verloop? Waar staan hulle

nou? Mosambiek is kommunisties en daar is reeds begin met die implementering van Marxisme in Angola.

Suid-Afrika het grootliks sy eie onafhanklikheidswording gehanteer. Ook Swaziland, Lesotho en die tuislande is deur Suid-Afrika tot onafhanklikheid gelei. En hoe het sake hier verloop? Goed. En waar in hierdie lande neig dit na Marxisme? Hierdie lande kry egter nie internasionaal erkenning nie.

In Afrika speel die groot stryd tussen die wêreld se twee magsblokke af: Die Weste teen die Kommuniste. Dit blyk egter dat die Weste nie bekommerd is om veld te verloor nie.

Dit kom dus voor asof die Westerse diplomate nie hulle huiswerk doen nie. Hulle ken nie werklik die omstandighede en behoeftes van die mense in SWA/Namibië nie. Kan die VVO ook werklik vertroue hê om onpartydige inligting te kry van 'n partydige verteenwoordiger soos mnr. Martti Ahtisaari? Sou die Weste sy huiswerk doen en sou Martti nie so met die een oog kyk nie, dan sou daar nie elf lande en vyf partye nodig wees om te besluit nie. Dan sou hulle dit nie nou nog as 'n dekolonisasieproses beskou nie. En sou Swapo nie in die ertoele van 'n bevrydingsorganisasie sit nie.

Ideologies kan gedekolonialiseerde Afrika nie met oorblywende kolonialisme saam bestaan nie. Is SWA/Namibië egter werklik nog in die ou klas van 'n kolonie wat deur 'n swart nasionale beweging, soos Swapo, vrygemaak moet word? Die leier van die vryheidsbeweging word dan soos in die verlede die leier van die regering en hy regeer soos dit hom pas (hy besluit selfs op Marxisme: dis mos sy land, hy kan maak daarmee wat hy wil). Is dit ook die prys vir SWA om internasionaal erken te word? Is dit die doel van al die mense by die samesprekings?

Moet swart en wit, wat nou na die eerste verkiesing saamstaan, alles opoffer, en plek maak vir so 'n onseker toekoms?

Die mandaathouer oor SWA - Suid-Afrika - kan mos self die onafhanklikheidsproses hanteer. Kyk na die orde voor die eerste verkiesing, kyk na die geesdrif waarmee die Suidwesters gaan stem het en kyk hoe het hulle gestem: 'n stemper-sentasie van 81.

Vra nou, na al die pogings met samesprekings oor die skikkingsplan, aan Kurt en Martti en die Wesmagte - Hoekom? Is dit 'n prys vir internasionale erkenning?

UIT
NO.
13

Lesers word vriendelik uitgenooi om briewe aan Die Wapad te stuur vir publikasie. Briewe mag onder skuilname geskryf word. Let egter asseblief daarop dat u volle naam en adres op die brief moet vergeselskap anders kan dit nie gepubliseer word nie. Om te verseker dat u samewerking dié verband - Red.

Uit die V

Psalm 12:7: "Mense se woorde is vals, onbetroubaar. Die Here se woorde is volkome betroubaar!"

So sê Dawid - geïnspireer deur die Heilige Gees - in Psalm 12. In vers 7 sê hy: "Die woorde van die Here is rein woorde". Rein - silwer skoon, suiwer, sonder enige vlek of vuilheid. So is die woorde van die Here. Nie van die valsheid van die mense se woorde, is by dié van die Here te vinde nie.

Hoe is die mense se woorde?

Dit lyk of daar niemand is wat die waarheid praat nie (vers 2). Mense lieg vir mekaar. (vers 3a)

Mense mislei mekaar; hulle is agterbaks; hulle sê een ding maar doen 'n ander; hulle hou 'n sekere gesindheid voor, maar in hulle hart is 'n ander; hulle vlei mekaar maar met allerhande bymoetiwes. (vers 3b). Soos dit in Psalm 55:22 staan:

"Glad is die botterwoord van sy mond, maar sy hart is oorlog; sy woorde is sagter as olie, maar hulle is ontbloot swaarde".

Mense loën met hulle tong God se heerskappy oor hulle lewe. Hulle sê: "Ons is vry. Ons kan doen en sê wat ons wil! Niemand kan my lewe vir my reël nie!" (vers 5) - en dis 'n leuen!

So is die mense se woorde - vals, onbetroubaar! Maar die Here se woorde is rein.

Hy lieg nooit!
Hy mislei niemand!
Hy sê nie een ding, maar doen 'n ander nie!
Hy trek nie sy beloftes terug nie.

Wat Hy sê, dit doen Hy!
Wat Hy belof het, dit gee Hy!
As Hy sê dat elkeen wat in Jesus Christus glo, die ewige lewe sal hê, dan bedoel Hy dit.

As Hy sê dat Hy die kaf me onuitbluslike vuur sal verbrand, dan bedoel Hy dit ook!

Sy woorde is rein, soos silwer wat gelouter is, gesuwer sewe maal. (vers 7). Sy woorde is soos silwer wa

KARNAVAL- VOORSITTER LIG PUNTE TOE

Geagte Redakteur

Ten spyte daarvan dat alles menslik moontlik in die stryd gewerp is om Karneval '79 regverdig aan te bied, is daar tog steeds nog 'n gebrom onderlangs en selfs 'n brief (Die Wapad 16 Maart 1979) oor die Karneval-punte.

Met alles menslik moontlik bedoel ek die volgende:

● Een lid op die Karneval-komitee se portefeulje was PUNTE. Dis die eerste keer in vier jaar wat dit so gedoen is. Die lid kon sy volle aandag aan die insameling en verwerking van punte gee.

● Op Kampusfokus, sowel as verskeie vergaderings van die Karnevalkomitee saam met Koshuisvertegenwoordigers/Prims, is die Karnevalkomitee se beleid, "Karneval '79 sal regverdig wees" duidelik uitgestip.

● Minstens twee SPESIALE

VERGADERINGS met die Prims is tydens Karneval gehou om probleme oor punte te bespreek en elke keer is daar konsensus oor die probleme verkry.

● Alle Karnevalkomiteelede is opgeskerp om baie noukeurige te werk te gaan by die punteberekening van hulle onderskeie aksies.

● Alle klagtes oor punte wat die Dagbestuur van die Karnevalkomitee bereik het, is ondersoek en die mees bevredigende oplossing is telkens gesoek.

● Aan alle koshuisvertegenwoordigers en Prims is dit herhaalde kere gestel dat hulle asseblief dadelik moet kom praat as hulle oor enige iets van die Karneval, dit wil sê ook punte, ontevrede is.

● Die punte was vir 'n week na die Karneval ter insae in die SSR-kantoor sodat almal geleentheid kan hê om dit te sien en besware te kan lug. Ná 'n verdere dagbestuursvergadering is dit as finaal aanvaar en in Die Wapad geplaas.

So kan daar aangegaan word. Alles pogings om ooreenkomstig die Komitee se beleid te sorg dat "Karneval '79 regverdig sal wees". Met goeie grond kan daar dus gesê word dat die Karnevalkomitee van 1979 uit sy pad gegaan het om te probeer regverdig wees.

Uit die aard van die saak, die sondige natuur van ons almal en die gebroke wêreld waarin ons leef, kan niks volmaak gedoen word nie. Ons erken, baie foute is gemaak, nêrens na my beskeie mening, doeltbewus om 'n koshuis te bevoordeel of te benadeel nie.

Aan ons vriend, Willem van der Vyver: Ek hoop bostaande het sake vir u bietjie duideliker gemaak. Net nog dit:

● Alhoewel die Karnevalkomitee onder die SSR gepatroneer is, het die SSR in die besluite oor punte GEEN

aandeel gehad nie. Dit was besluite van die Karnevalkomitee. Die versoek vir 'n massavergadering spreek dus duidelik van oningelikhed, en as iemand gekritiseer moet word, is dit darem te lekker om maar vir alles altyd die skuld op die SSR te pak.

● U en die massa Pukke het beslis nie ELKE kompetisie tydens Karneval gesien nie. Woordboukompetisie, kollektelyste en Pukkies-verkope is bv. aksies wat baie beslis (1200 punte) 'n groot invloed op die stand van die koshuis gehad het. Veronderstel u is in koshuis A, dan weet u baie beslis nie presies hoe koshuis B, C, D, ens. in hierdie drie aksies gevaar het nie. Om op te som: u is nie 'n bobbejaan nie.

'n Laaste gedagte in die algemeen: Ek dink die Karneval moet in die toekoms NIE op kompetisiebasis aangebied word nie omdat

● daar nooit 'n volmaakte Karnevalkomitee sal wees wat geen foute sal maak nie. Tog jammer dat die grootste kritici gewoonlik die verste weg is wanneer 'n Karnevalkomitee saamgestel moet word;

● Ons arme Pukke nie positief en gesond kan kompeteer en dit kan vat om te wen of te verloor nie. Ons is kleinlik (baklei vreeslik oor tien punte waar daar "dalk" gekul is!) en persoonlik (die Karnevalkomiteelid is uit koshuis A en nou sal hy koshuis A of die res bevoordeel of benadeel), en nie volwasse genoeg om in 'n gees van "Dit is Karneval, kom ons geniet dit, die wen is van minder belang" te kompeteer nie.

Baie dankie aan al die Karnevalkomiteelede vir baie ure se harde werk en baie offerings, baie dankie aan die Prims en HK-lede vir samewerking en oor die algemeen 'n baie mooi gesindheid.

Sterkte vir Karnavalkomitee 1980!

JAN BOTHA
KARNAVALVOORSITTER
1979

(Die Wapad spreek die hoop uit dat die onduidelikhede oor die Karneval nou uit die weg geruim is en dat tyd en energie nie verder daarvoor verspil sal word nie - red.)

SPOTPRENT ONTLOK REAKSIE

Die Redakteur,

In Die Wapad van 16 Maart 1979 verskyn 'n spotprent van die ASB wat hande skud met NUSAS. Gebreke pyle en vernielde staalmonderings kleur die prentjie verder in. Wat is die verhaal agter die spotprent, meer nog, wat is die verhaal wat volg? Seer sekerlik nie die ligsinnigheid van 'n Bols-grap nie.

Nie eers tien jaar gelede nie het NUSAS die Afrikaner uitgekryt vir 'n rassie. Die ASB het die Afrikaner beskerm, selfs teen NUSAS se velde getrek. Ons was dit almal eens dat daar groter dinge agter NUSAS gesit het as wat dit op die oog af gelyk het. In 'n studiestuk met die titel: "Secret United States War Against South Africa", geskryf deur Aida Parker, word onder andere genoem dat NUSAS die spreekbuis van linkse buitelandse druk-groep is, waarvan die CIA prominent in sy ondersteuning was.

Vandag kom die ASB met dieselfde houding as NUSAS vorendag. Dit is duidelik dat die ASB die Beleid van Afsonderlike Ontwikkeling as 'n klad op Suid-Afrika se naam beskou. Ons moet die Swartman (gister was hy Pluraal, môre is hy seker meneer) gelykwaardig behandel. Snaaks genoeg, hy

weet nie wat gelykwaardigheid beteken nie, totdat linkse agitators met hul propaganda aan hom verduidelik dat hy dit nie het nie. Die geskiedenis het tog duidelik gewys dat dit nie daarom gaan om hom gelykwaardigheid te gee nie, maar om hom op te steek tot rewolusie, sodat "ander elemente" hul doel kan bereik.

Nou vra die ASB die Engelsman dat hy moet wag, die Afrikaner kans moet gee om by te kom, veral wat politieke denkwyses betref. Glo my, as die ASB hande skud met NUSAS wat, soos voorheen gesê, sterk deur die CIA beïnvloed is, kan enige logiese denkende mens (selfs met 'n ondergemiddelde IK), seker tot die heel logiese gevolgtrekking kom dat die ASB terselfdertyd hande skud met die CIA; hetsy onbewus of doeltbewus. Beteken "Ons sal offer wat jy vra" dat ons nou ewe verlee aan die Engelsman om verskoning moet vra vir ons "infantiele denkwyses" van 'n paar jaar gelede? Beteken dit dat ons nou saam met die stroom moet loop? Nee, ek dink eerder dis 'n kwessie van: die Engelsman het die kruiva gemaak, en nou stoot die Boer hom. Wil ons hierdeur progressionisties wees? Onthou die woorde in die studiestuk "Rassisme": "Die beginsel is geen maatstaf om nuwe idees te toets nie".

In 'n leeskamer in Soweto is honderde boeke wat handel oor "Swartmag, Swartbewussyn, omverwerping van Blanke minderheidsregering", ens. Daar kort nog net een publikasie op die rak om swart onluste verder aan te blaas, naamlik die studiestuk oor rassisme, uitgegee deur die ASB. Geskryf in 'n styl wat erg aan Alan Paton herinner, is dit 'n manjifieke propagandastuk vir rasse-onluste. Dalk pryk hy reeds op die rak in Soweto se leeskamer. Kom die oortuigings wat gehuldig word uit ASB-kringe self? Indien nie, wees versigtig: "Meng jou met die semels, dan vreet die varke jou op."

INTERROGATIVE

Die Afrikaner vra nie bykomkans van die Engelsman nie - ek dink ook u lees die rassisme-studiestuk baie subjektief. 'n Goeie Afrikaner is 'n goeie Christen - en die studiestuk is Bybels goed verantwoord - red.)

KRUISPAD- VERSLAG GEKRITISEER

Die Redakteur,

Na aanleiding van 'n studie oor die Kruispadprobleem het ek onder andere opgemerk dat hierdie probleem internasionaal aandag geniet; dat dr. Mulder en die SA regering aandag aan die saak gegee het; dr. Koornhof die eerste dag na sy ampsaanvaarding in Kruispad gaan samesprekings voer het; en dat hy net "'n bloot regverdigende menslike oplossing" wil hê!

Nou: Die Afrikaanse Studentebond het dit goed gedink om 'n studie te maak oor die hele Kruispadpetalje. Verteenwoordig hulle die algemene Afrikaanse student? Voorkoming is beter as genesing. Dus: waarom het al die swartes na die Wes-Kaap gegaan? Omdat daar werk was, en waarom kon hulle so maklik in diens geneem word? Min mense is bewus van die plan van aksie teen

die beleid van Afsonderlike Ontwikkeling wat deur linkse groepe van stapel gestuur word, met die steun van buitelandse druk-groep. Dit gaan om 'n stedelike swartman te vestig, of te wel "Common Area" te bewerkstellig.

So hard as wat die pligsgetroues die tuislandbeleid probeer deurvoer, net so hard trek die linkses hulle na die stede toe. Die gevolg? 'n Plakkerskamp en, soos ons 'n week of wat gelede gesien het, stakings. Behalwe dat die studiestuk oor Kruispad daarop sinspeel dat dr. Mulder sy werk nie gedoen het nie, is dit verder bloot 'n propagandastuk vir dr. Koornhof.

Dus, dit is net hier waar ek ook my standpunt wil stel: waarom moet ons nywerhede in SA arbeidsintensief bly en tegnologies agter raak om arbeidsintensiewe werk vir oortollige swartes in blanke stede te verskaf? Dit laat ons nee sê vir die vooruitgang in die tegniek, ter wille van die onvermoë om sinvol vooruit te beplan. Dit is ekonomiese **OBSKURANTISME**

OF moet ons die nywerhede in die blanke gebied so gevorderd moontlik opbou en beplan en waar nodig tegnieke verouderde nywerhede in die tuislande 'n beskermde mark in die blanke gebied verskaf? Die Blanke moderne nywerheid moet dan mededingend op die uitvoermark wees. My antwoord is dus: Selektiewe indiensnemingsbelasting. Dit is belasting op die loon wat die nie-blanke arbeider in Blanke gebied verdien en deur die werkgewer betaal word. Die doel is dus:

● Die aantal swartes in diens van ondernemings in die Blanke gebied sal beperk word.

● Hoë arbeidskoste van die swart arbeid in die stede sal verminder word deur beter gebruikmaking daarvan. Selfs 'n 25 persent loonbelasting sal nie die totale nywerheidskoste opstoot nie omdat die aanwending van swart arbeid tans nog uiters skokkend is.

● Die geld wat so verkry word, sal dan help om die nywerheidsontwikkeling in die tuislande te finansier.

Dr. Ntsangwesi van Gansankulu het op 'n stadium reeds 'n eis gestel van tien persent van die loon wat sy mense in die stede verdien. Dit was al 'n stap in die regte rigting. Die gevolgtrekking is dat beter finansiering van die ekonomiese ontwikkeling in die Transkei nooit die Kruispadprobleem sou laat ontstaan het nie.

Swart loonbelasting sou die aanvraag en aanbod na swart arbeid laat krimp het.

Die ASB het en laat hom as handperd gebruik deur mense wat die Kruispadprobleem wil aanblaas om sodoende die Regering in die verleentheid te stel. 'n Ernstige vraag aan die ASB - aan watter kant staan jy?

DOGMATIX

(ASBeelde, of ASB-studiestukke, verteenwoordig NIE die amptelike standpunt van die ASB nie, maar net die van die opstellers. Dit is interessant dat u onder die indruk verkeer dat die studiestuk oor Kruispad daarop sinspeel dat dr. Mulder nie sy werk gedoen het nie - toe hierdie selfde vermoede op die atgelope ASB-hoofbestuursvergadering aan mnr. De Swart, die opsteller, gestel is, het hy uitdruklik gesê dat dit nie die bedoeling was nie. - Red.)

MYNERS STAAK

Myners staak as gevolg van die verdwyning van werkers-reservering. Die massastaking van Blanke myners die afgelope week, verskaf stof tot ernstige nadenke. Die staking was onwettige optrede, aangesien daar nie gebruik gemaak is van die masjinerie wat deur die staat geskep is om geskille op te los nie. Die stakers het ook nie aan die Kamer van Mynwese kennis gegee nie, soos vereis word in die Wet op Nywerheidsversoening nie. Die gevolg was dat 'n klousule in die betrokke werkers se dienskontrak in werking gestel is, waarvolgens hulle diens outomaties beëindig is. Die werkers is ontevrede oor die afskaffing van werkers-reservering in die myne. In die O'Kiep-kopermyne is drie kleurlingwerkers aangestel in geskoolde werke wat voorheen vir Blankes gereserveer was. Dit het geleid tot 'n staking wat die simpatie van die onwettige stakers op ander myne gewek het.

Werkreservering is in die Nywerheidsversoeningwet vervat onder die voorwendsel dat dit rassewyding sou uitkassel, deur te verhoed dat rasse in dieselfde bedryf met mekaar kompeteer. Dit het egter net aanleiding gegee tot verdere rassewyding, aangesien dit die Nie-blanke gefrustreer het. 'n Kunsmatige plafon is deur

die werkgewer vir die Nie-blanke werker geskep. Die werker kan nie op eie prestasie deur die plafon breek om sodoende 'n werk te doen wat hy verdien het om te doen nie. Vanselfsprekend het dit inbreuk gemaak op sy produktiwiteit en vanuit 'n ekonomiese standpunt gesien, is dit 'n euwel.

Die Nie-blanke het verder tereg hierin 'n vorm van gruwelike diskriminasie ten opsigte van ras en kleur teen hom gesien. Dit is 'n blatante vorm van bevoordeling op grond van 'n wit vel, en nie op grond van verdienste nie.

Eties kan dit ook nie regverdig word nie. Die calvinistiese standpunt soos weergegee deur prof. B. Duvenage in sy boek "Beroepsarbeid in die lig van die Gereformeerde Etiiek", is dat arbeid 'n roeping van God aan elke mens is.

Die mens moet in die uitvoering van sy beroepsarbeid op horisontale en vertikale vlak dien. Dit kom daarop neer dat die arbeid in diens van God moet staan sowel as in diens van die gemeenskap. Hy skryf: "Die gedagte dat sekere arbeid eintlik natuurlike-arbeid is, moet met beslisheid verwerp word." Werkreservering staan lynreg in botsing met hierdie aanhaling. Hy skryf dat by die keuse van 'n beroep, die persoon se subjektiewe aanleg en neiginge

ter sprake kom, juis omdat die voorsienigheid van God nie die persoonlike verantwoordelijkheid van die mens uitkassel nie. Met hierdie standpunt is nie te versoen dat die werkgewer sekere beroepe buite die bereik van sekere persone stel nie. Omdat arbeid 'n roeping van God is, mag die mens nie ligtelik inbreuk maak op die keuse-vryheid van die individu nie. Soos Duvenage dit stel: "In die keuse van sy beroep bly die gelowige primêr aan God verantwoordelik." (p.121) Wie is die menslike wetgewer om homself in die posisie van God te plaas?

Die Regering het in die afgelope jare prysenswaardig wegbeweeg van werkers-reservering. Dit wil egter lyk of die werkers die regering nie steun in sy beweging nie. Is dit nie tyd dat ons daarvoor besin nie? Die verwydering van werkers-reservering sal 'n heilsame uitwerking op die landseconomie hê. Produktiwiteit kan opgestoot word deurdat sekere blanke werkers hulle arms uit die mou sal moet steek ten einde hul werk te behou. Nie-blanke werkers sal meer hê om na te streef, en rassewyding en frustrasie sal uitgeskakel word. Bo alles sal dit egter beroepsarbeid in Suid-Afrika op 'n etiese grondslag plaas.

ord

sewe maal, dit is volkome, deur vuur gesuiwer is.

Die bedoeling is nie hier dat die Here se woorde eers vuil was en toe gereinig is nie, maar die bedoeling is dat Sy woorde die toets van loutering deurstaan het, en ongeskonde en suiwer anderkant uitgekome het.

Dink maar aan Sy verbond met Israel.

Ten spyte van hulle ontrou en valsheid, het Hy getrou gebly, en hulle die beloofde land gegee.

Die kwaaieste loutering was egter op Golgotha; want water kwaaiër toets kon daar wees vir God se belofte dat Hy sy volk van hul sondes gaan verlos, as dit:

dat Hy sy enigste Seun onskuldig aan die kruis moes laat spyker, vir sondaars...

Maar ook hierdie loutering het God se woorde ongeskonde deurstaan.

Sy woorde is volkome betroubaar!

Daarom kan ons wat in Hom glo, vandag nog op Sy beloftes peil trek, want "Hy wat selfs sy eie Seun nie gespaar het nie, maar Hom vir ons almal oorgegee het, hoe sal Hy nie saam met Hom ons ook alles genadiglik skenk nie?" (Rom. 8:32)

Om Christus ontwil het God dan ook aan ons Sy Heilige Gees gegee, wat ons nuwe lewe gee, wat ons mense maak wat die waarheid liefhet en die leuen haat. Daarom moet ons alle leuens afleë.

"Lieg nie vir mekaar nie, omdat julle die oue mens met sy werke afgelê het en julle jul met die nuwe mens beklee het". (Kol. 3:9,10).

Lieg ook nie vir God nie: "Hy wat sê: Ek ken Hom - en sy geboorte nie bewaar nie - is 'n leuenaar". (1 Joh. 2:3).

en "As iemand sê: Ek het God lief - en sy broeder haat, is hy 'n leuenaar". (1 Joh. 4:20)

Laat dit duidelik word in ons lewe en woorde dat ons anders is van God, dat ons aan Hom behoort wie se woorde rein en gelouter is.

Laat ons al ons vertroue op Hom stel, en op al sy beloftes. Ons sal nooit bedroë of uitgekome nie!

Spektrum

1979

Skemer Wenen vonkel

Die eerste Skemervonkel in die foyer van die PU Kamertoneel beloof om liefhebbers van musiek te bekoor en non-liefhebbers te bekeer...! Onder leiding van Brenda Potgieter neem Rina Hugo en Paul Schutte se stemme ons na "Wenen, stad van my drome..."

Wenen, die werkplek van menige groot komponis, Wenen die stad van Johann Strauss, die wals en die Blou Donau... Brenda se Wenen is die stad van die "Heuriger", die gemoedlike wynhuise waar vriende bymeekaarkom en na die Schrammelmusiek van viool en kitaar, trekklavier en kontrabas met oor-

gawe luister.

Vir 'n uurtjie van heerlike gesinsvermaak is die eerste SKEMERVONKEL van die Departement Spraakleer en Drama in die foyer van die Kamertoneel 'n uitstekende keuse.

Wenen, stad van my drome o.l.v. Brenda Potgieter 26-30 Maart.



Die Potchefstroomse "Wiener Schrammel Ensemble" is die musikante wat mens met musiek wegvoer na "Wenen, stad van my drome". (Foto: Frik Schoeman).

Gedigte

die gekneusde holte van hul oë
rook roosmaryn en winterslaap
klein seuntjies wat in vensterbanke droom
place de resistance van die kunstklas

met sy uitgeteerde leermaesters met
mosgroen oë wit jas verwees fladderend
en twintig besiedes besoedeldes wat
verbete bid om kruis na kwas

oor 'n kweper en 'n flitsie glas

NANETTE PRETORIUS

Wie het my geharlekyn
sy mantel, mus en tamboeryn
soos wafferse nar
in my waarheid kom skyn
Het jy my dan met hanekraai
met tassels en linte en bokspring
en paal die koning
bedrewe van sy sonde verraai

WILMA VAN DER WALT

KALENDER 79

KUNSUITSTALLINGS

26 Maart - 6 April: Riena van Graan - 'n uitstalling in die Frans du Toit-kunslokaal.

MUSIEKUITVOERINGS

26 Maart: Heinrich Schiff, Oostenrykse tjellis, begelei deur Lamar Crowson.

DEPARTEMENT SPRAAKLEER EN DRAMA

26-30 Maart: Skemervonkel- "Wenen, stad van my drome" o.l.v. Brenda Potgieter.

31 Maart en 2-11 April: Die Rissie- Charles Marowitz- Regie: Liesbet Schoeman.

CINE- PUK

30 Maart: Wild Bunch: Vrydae 17h30 en weekdae 19h30

KOMPETEER MET POËSIE

Die Wapad bied weer vanjaar in samewerking met ASPU 'n poësiekompetisie aan. Die wengedigte word ingeskryf vir 'n landswye kompetisie waarin die meeste kampusse sal deelneem. Die sluitingsdatum is 7 Mei 1979 en geen laat inskrywings sal aanvaar word. Verdere besonderhede sal in volgende week se Wapad verskyn.

Die reëls van die poësiekompetisie is as volg:

- Elke deelnemer kan meer as een gedig inskryf, maar word beperk tot 'n maksimum van vyf gedigte.
- Van elke gedig moet drie afskrifte gemaak word. Waarvan een die volledige naam en adres van die deelnemer moet hê. Die ander drie

moet net voorsien te wees van 'n skuilnaam of naam.

- Al die inskrywings moet in die Wapad-buise by die SSR-kantoor geplaas word. Dit moet asseblief duidelik WAPADPOËSIEKOMPETISIE gemaak wees.

- Die redaksieleda mag wel aan die kompetisie deelneem, maar kom

nie in aanmerking vir die pryse nie.

- Ingeskrewe gedigte mag nie reeds in 'n nasionale publikasie verskyn het nie.

- Die wengedig sal in die Wapad geplaas word.

Verdere besonderhede kan verkry word by André Howard (3468) en Johan Myburg (6668).

Mode Bewuste Dames

Antonion, van Maison Hazelette,
(Tel 5570, oorkant Checkers)
is pas terug van 'n kursus in die

= Vuilste Haarsny en
Kartelings metodes.

Kom vra vir Antonio vir die
allernuutste voorkoms teen

Spesiale Studente Pryse

RISSIE KRIEWEL IN DIE MAAG

'n Vertaling van die werk van Charles Marowitz, The Shrew, word vanaf 2 tot 11 April as Die Rissie in die PU Kamertoneel aangebied.

In dié werk maak Marowitz gebruik van die klassieke werk van Shakespeare, Taming of the Shrew (1593). Dié werk van Marowitz is beslis nie 'n komedie wat ontspanning en ontvlugting vir die gehoor bied nie. Marowitz behandel die gehoorlid net so subtiel wreed as die karakters in dié stuk. Die

skrywer ontstel 'n mens, hy laat jou wonder, her-oorweeg. Hy bereik wat elke goeie teater veronderstel is om te bereik, naamlik, om die gehoor so ver te kry om passiewe aanvaarding van die bekende dinge te verruil vir 'n her-onderzoek van waardes wat dieper as die oppervlakte dring.

CINE PUIK VERTOON REKLAMEFILMS

Mej. Anne-Marie Jacobs beoog om in samewerking met die Cine Puk 'n reeks reklamefilms oor die verskillende rade en verenigings op die PU saam te stel.

Daar is so baie verskillende verenigings dat die meeste studente nie weet wat dit alles behels nie. Die skuilies sal deur die verenigings verskat word en sal so saamgestel word dat dit lig op die bedrywighede van die spesifieke vereniging werp. Hierdie skuilies sal dan as voor-

prente deur die Cine Puk vertoon word.

Die presiese datum wanneer daar met die vertonings begin sal word, is nog nie vasgestel nie. Mej. Jacobs het gesê sy sal teen die middel van Maart met 'n ondersoek na die beoogde projek begin.

Koshuis

Makoulei

Die laaste crescendo-gille van 'n dorelled het nog trilend oor die dak van die sentrale eetsaal aangesweef gekom, en 'n bloedbevlekte studentesentrum het nog stilswyend sy verdoemende getuies van wraak en vergelding teen ongewenste indringers gedra... toe hou ons Makoue al ons eerste amptelike koshuisberaad vir die jaar 1979.

Die beraad, gekenmerk deur die strengste wanorde en mees vasberade vervelendheid, het aan die een kant trekke getoon van optimisme, aan die ander kant trekke van pessimisme en aan die derde kant trekke van karnavalisme.

Terwyl die een voorstel na die ander geveto word en nuwe voorstelle met groot erns en na diepe oorweging ter tafel gelê is, het die gees van Makoulei weer begin herleef na die uitputtende vakansie.

Die puinhope van oorwinning wat in en om Makoulei opgestapel staan, spreek hard en duidelik van die dae en nagte wat omgeswoeg en omgesweet is, en van die nuutgevonde liefdesbande wat daar tussen ons en Karlien in die besonder gesmee is.

Karliën, ons saluêre jou vir die karnavalste-karnaval in jare, en die naklank sal in die eeue wat kom nog lank gehoor word. Dis 'n karnaval waarvan ons agterkleinkulken en agterklein(donkie)-vullens sal praat.

Wanda

Karnaval het sy tol ook hier geëis. Af arms en bene, seer spiëre en hope agterstallige werk is aan die orde van die dag. Binne in jou weet jy egter dat dit die moeite werd was. Dankie Caput vir 'n grootse karnaval. Sonder julle sou dit nie dieselfde gewees het nie.

Met die intrapslag het Wanda op 'n hoë noot begin, deur die damestrapkar te wen. Ook by die Kaap-na-Rio, toutrek, en wisselloop het ons ons stemme dik gemaak. Saam met Caput het ons die stalletjies en popkoppe gewen en waar ons nie gewen of goed gedoen het nie, het ons Wandagees gesorg dat ons gehoor word.

Met mense soos Isabel Malan, Nanda Barnard en

Christien van der Walt het ons met die Puk-kampioenskap-louere weggestap.

Ons moet darem die ander koshuise waarsku dat ons van plan is om die hokkie en netbal ook hierdie jaar te wen. Die spanne het al begin oefen.

Wanda-groete.

Uitspan

Karnaval is verby en die lewe is besig om na normaal terug te keer. Die eens begaafde akademie moet nou met groot moeite en sweet opgediep en ingehaal word.

Die Uitspanners het alle verwagting oortref en derde in die karnavalkompetisie geëindig. Die sukses word toegeskryf aan die onbaatsugtige diens wat elke inwoner verrig het.

Ons "Volley-ball"-blad het intussen van lewensgevaarlike oppervlaakte na 'n baan van internasionale standaard verbeter. Die amptelike inwyding sal later van stapel gestuur word.

Die "Bachelors-club" se ledetal is besig om 'n sorgwekkende daling te toon. Die karnaval en Dinki se teenwoordigheid word as die sondebokke beskou.

Die interkoshuis-gala het baie goed afgegaan, die manne het dit baie geniet en daar het selfs 'n paar hoogtepunte opgeduik.

Die Uitspanners het in hulle hordes opgetrek na Klooster. Daar het 'n litaniëse sokkerstryd ontstaan en na 'n lang gesukkel was die telling twee elk.

Sterkte met die akademie, Pukke!
Rooibeer-groete.

Liberalia

Met gesigte vol kommer dwaal die ouens tot laat-aand doelloos in die koshuis-gange rond, met die hoop om 'n uitweg te vind vir al die probleme - akedemiese probleme wat as gevolg van karnaval 'n onuitwisbare spoor nagelaat het.

Elke af periode is nou van belang. Eers 'n paar woorde wissel om 'n koppie tee op die stoep en weer terug kamer toe.

So teen vieruur se kant word daar van al die frustrasies ontslae geraak op die rugbyveld, die atletiekbaan, muurbalbaan ens.

Eettyd en sleeptyd breek aan. Hennie neem die voor-

tu om sy verloofde, Rina, van Wag-'n-Bietjie te gaan besoek en keer dan gewoonlik net na Schalk, Atoom en Ramaja terug.

Die ouens vergader weer op die stoep om 'n storie of twee te hoor of te vertel. Die aand begin end se kant toe staan, die televisie sluit af met die Stern en op die gesigte van die ouens is daar kommer - die akademie druk.

Thaba Jäh

Ons sê baie dankie vir 'n lekker karnaval, en veral dankie aan Kulu saam met wie die karnaval 'n reuse sukses was. Dit is te sien in die feit dat ons die vlot kompetisie gewen het. Oudergewoonte het daar dan ook 'n paar romanse ontwikkel gedurende die tyd, en ons hoop dit is blywend.

Dan is daar ook nog die ampsmotor van die koshuis n1, Blerits, wat swaar dra aan al sy kleure maar tog loop soos 'n bom.

Die feesviering is egter voorlopig verby en nou lê die toets voor. Almal moet vasbyt voor die boeke om in te haal waar daar agter geraak is gedurende die karnaval. Ons wil egter die ouens waarsku om nie so vroeg in die jaar te hard te werk nie want dan sal julle nooit die einde van die jaar haal nie.

Groetnis.

Heimat

Ja, en so is nog 'n Karnaval onder die stof van tyd begrawe. Heimat bedank Vergeet-my-nie vir die gees wat ons saam kon opbou tydens Karnaval.

Dit wil lyk of die manne van Heimat nou begin kyk na die jaar wat voorlê, want die akademie is nou vir almal 'n saak van die hart, ten minste, 'n saak van die daad vir die meeste.

Dinge in Heimat gaan sy gang soos alle dinge, maar daar is tog 'n paar sake wat genoem moet word: Die "Blue gum club" het nog lede bygekry wat onlangs in die "tande geskop" is. Die A.S.V. (almal sonder vroue) is ontbind.

Dan is daar die geheimsinnige K.K.K.-figuur wie se identiteit verlede jaar op die lappe gekom het, wat weer uit sy skuilplek gesluit het.

Verdere geheime bewegings in Heimat is nog sluimerend in dié stadium van die jaar.

Verlede naweek met die rugbywedstryd teen Kempton Park het Gerard Jordaan (Jorrie) die wendrie gedruk nadat hulle tot in die laaste minuut agter was.

Christo Botha het 'n derde plek gekry in die 400m hekkies in die intervarsity atletiek byeenkoms. Heimat se aflosspan het die aflos gewen.

Verder lyk dit of die belangstelling in pluimbal ook sy intrek geneem het onder sommige van Heimat se manne.

Dankie aan die manne wat in die fietstoer vir ons 'n vierde plek losgery het. Daar-deur het ons sommige groter koshuise in die stof laat byt.

In die trapkarwedstryd het

dié manne vir ons 'n tweede plek gekry.

Dit lyk of Heimat nou op volle sterkte is ná die uitsluit van 'n paar "slap siele."

Heimat groete.

Kulu

Die inwonersvraggie is heelwat minder. Met siegs veertien eerstejaars en amper vyftig seniors begin KULU al vroeg met aksies.

Dis kenmekaar, programme, ontheffings... Die ontgroening is reeds deel van 'n heerlike en aangename verlede. Menige "door" verlang sekerlik terug na die aande van konsert hou en hare vleg.

En so vlieg die weke verby en bring ons by karnaval. Hou saam met jou bure karnaval, en siedaar, 'n kitsresep vir 'n suksesvolle "geesvang" en 'n fees van 'n karnaval.

Elke aand word daar vlot gebou en gesels en behoorlik kennis gemaak tot laat. Daarmee word die aande verwy. "Slaap" is 'n onding en word net in allernodigste omstandighede gedoen.

Tussendeur hou Gang een en Gang vier nog 'n kussinggeveg. Die manne besluit om te kom handgee(?!). Die aand word afgesluit met waatlemoeneet en 'n slapie in die vierkant.

'n Baie oorspronklike "KULU SE KOOS" neem deel aan die Kaap na Rio.

Vrydagaand vertrek die dames na die sportterrein. Dit gaan goed maar twee ongevallen keer terug.

Die hoogtepunt van karnaval was Saterdag. Thaba-Kulu-Jäh is die wenners van die vlotboukompetisie! En om daarna nog vooraan al die vlotte te ry is genoeg om die KULU-dames en Thaba-Jäh meer as net trot te laat voel.

Met 'n behoorlike viering word karnaval die aand afgesluit op 'n hoë noot.

Die akademie wag en die pret is verby.

Wag-'n-bietjie

Die bont skilpad se dames het Karnaval '79 gevat en dit geplaas waar hulle dit wou hê. Sommer lank voor die Karnaval het die dames al groot interaksies met die Hombré-manne gehad. Die hoeveelheid dames wat nou vassleep in Hombré getuig van die sukses daarvan.

Sommige mans het op 'n ongeleë tyd (na middernag) kom kuier en is met rakette en besems verwilder. Hulle verdediging het sommige dames nat, woedend en met knoppe agter die ore daarvan laat afkom. (!)

Die dames het kragte ingespan en saamgetrek na die Fanie du Toit vir die Mooirivierspele. Met 'n goeie gees het almal aan alle moontlike items deelgeneem. Iemand gedink 'n donkie is stadig? Nie as 'n Wag-'n-Bietjie dame op sy rug sit nie.

Die harde werk aan die vlot het dit 'n welverdiende tweede plek besorg. By Hombré het die vlotbouery glad verloop - die innerlike is versterk met pannekoek, vetkoek, roomys en spring-



Oosterhof en Over-de-Voor trou.

Foto: Gerhard v.d. Walt

mielies. Hierdie week drink al die dames dieet-Pepsi.

Voordat die dames hulle ten volle aan die akademie kan wy, lê die atletiekintervarsity en koshuisverjaardag nog voor.

'n Groep ondernemende jong mans het probeer om die potplante op die koshuis se stoep weg te dra. Hulle het egter nie rekening gehou daarmee dat die huispa op die hulpgeroep van die inwoners van die slaapsaal sal aggee nie. Byna te laat het hulle hul fout agtergekom. Onthou volgende keer dat die

opvoedkunde-gebou se kennisgewingborde nie genoeg skilling bied nie - 'n mens het bene ook, weet julle

'n Derde van Klawerhof se inwoners het verlede week in die bed deurgebring. Dinge begin nou na normaal terugkeer nadat die maaggrep-epidemie byna hande uitgeruk het. Menigeen kon naderhand nie meer die droë roosterbrood en swart tee in die oë kyk nie, en is baie bly dat sy nou weer vaste spys kan geniet. Welkom terug in die land van die koshuisinwoners.

Baie geluk ook aan Erina en Jan-Louis met hul verlowing - ons is saam met julle bly. Lekker nou, né!

Wapadjies

Bel Jacques by 3468 (Klooster) en laat 'n boodskap.

HOU S.A. SKOON:

Die Buit-Droogskoonmaakery en wassery, Uitsigarkade, reken vinnig en flink al met ghiesmerke, vakkolle en ander vorms van besoedeling. Kledingstukke binne siegs 80 minute droogskoonmaak. Wasgoed binne 'n halfdag gewas en gestryk. Ure: Maandag tot Vrydag - 7vm. tot 5.30nm. Saterdag - 8vm. tot 1nm.

KIES & KEUR:

Lyk jou kamer soos Vaalwater? Kry 'n poster by Kies & Keur! Val jou knope af, nate trek los? Naaldwerkbenodigdhede gajore by Kies & Keur! Behalwe materiaal, hoede, kunablomme en mandjies, het ons nog stapels en stapels ander goed. Val 'n dag af en kom snuffel rond by: Kies & Keur, Tomstraat 96.

MOOI BLY?:

Kom kyk na ons groot verskeidenheid parfuum, versankingsmiddels, proteïenvoedsel en skoonheidsmiddels vir 'n jaar van skoonheid wat voorlê. Die Buit Aptek, Tomstraat 88B & C, Potchefstroom. Tel. 5943.

BLY RY EN RY BLY:

Nigrini Batterie is die naam as jy jou kar wegspringgereed wil hou - sonder sweet, sonder bloeddruk en teen 40% korting, spesiaal vir PUK-studente lag jy heelpad bak toe op sakgeld-dag. Storm sommer nou na Lombardstraat 27 vir jou battery. Tel. 7609.

HOOR EN SIEN VERGAAN?:

Radio- en TV-dienste het 'n wye reeks batterye vir rekenaars, horlosies, radio's of wat ook al. Ons kitarekenaars en Aiwa stereo audioversterkers vir motorradio's is ons trots - die beste in Potch, Lombardstraat 42.

WIE WIL TROU?:

Ons het kortpad vir jou; besoek Ekeina, Santam-deurloop; Tel. 5412, vir daardie mooiste trourek vir jou.

BLOMME, BLOMME, BLOMME:

Ruikers, groot en klein, lieflike vars snyblomme en potplante wat jou jarelank geluk sal gee, is altyd te kry by FLEURETTE BLOEMISTE. Ons het ook ingevoerde syblomme wat so mooi is dat jy nie kan ophou kyk daarna nie. Maak gerus gebruik van ons KBA diens. Dit kos niks ekstra nie. FLEURETTE BLOEMISTE, Kerkstraat 83, Tel. 4062.

AFGESIN DEUR DUUR PETROL:

Dis nie nodig om jou kar in te ruil vir 'n mak donkie net omdat jou reistoelag nou skielik nie ver genoeg kan rek nie. Met 'n motorfiets van FRANK MOTO X kan jy meer as tweemaal so ver kom met dieselfde petrol. Vir alle PUKKE van statige professore tot lyn dametjies is daar die regte model by FRANK MOTO X, Lombardstr. 13, Tel. 5723, Potch.

VERSLANKERS!

By asseblief ver weg van TURKSTRA BAKKERY want die mees as wat vleis en bloed kan verdra. As jy eers eenmaal jou oë laat dwaal het oor ons goudbruin koekies, ons heerlike "kingsize" oliebolle, gevul met konfyt en room, tert, koekie en pastele. Dis nie so moeilik om TURKSTRA te vermy nie. Hulle is in Kerkstraat.

WERKI

Vakansiewerk vir mansstudente in die Aprilvakansie: verdien vanaf R100 per week vir demonstrasie en die neem van bestellings vir huishoudelike artikels. Losies en vervoer word verskat. Kontak student Gust by telefoon 339616, kode 016, Vanderbijlpark, vir verdere besonderhede.

STAAK DIE GEKEKKEL:

58 dit lewer met blomme. Blomme betuig liefde, inspireer, troos, sê dankie. Al wat jy moet doen, is om jou gesig by die geleentheid te laat pas. HUIS EN TUIN het die blomme, kom soek jou sêgoed by ons, Tomstraat, Potch.

TROUKAARTJIES:

Ons het, letterlik, eenduisend-voorbeelde van troukaartjies en bybehore vir daardie mooiste dag in u lewe. Ons nooi u om gerus ons katalogus te kom deurkyk, sodat u die heel beste keuse kan maak. Ons verseker u van persoonlike aandag en sal graag u vrae beantwoord. Skakel enige tyd! Tel. 24574.

WEES IN DIE MODE:

Skep jou eie uitrusings met 'n Elna, ons gratis lesse, raad en hulp. Santam-deurloop, Potch, Tel. 5412.

EK ADVERTEER KLEIN:

My profyl is klein - natuurlik tot u voordeel! Nuwe fietse, gebruiktes, onderdele en herstelwerk. Moenie baie sukkel nie - laat wiel na: PARK FIETSWINKEL. (F.F. Tranter), TEL. 4731, Van Riebeeckstraat 81.

TIKWERK:

Tikwerktafel: Enkeltref - A4 - R1,00 (tikpapier ingesluit). Een en 'n half - A4 - R0,75 (tikpapier ingesluit). Tik van wasvelle: R0,75 (wasvelle uitgesluit). Kontak mev. M. Myburgh, Gypsumstraat 15, Carletonville, Tel.: 01491 - 2850.



CERTAIN T SHIRTS

HIGH QUALITY SILKSCREEN PRINTERS

4 Grobler Street, Potchindustria
Tel. 23863

Turkstra
BAKKERY

SMAAKLIKE VLEISPASTEIE
BY DIE PUK-PIKI

POTCH-INRY

Mrt. '79

Tel. 21881

26-27 1ste THE GREATEST - Muhammed Ali.
30-31 2de THE GREATEST - Muhammed Ali.
28-31 1ste DIE VYFDE SEISOEN - Martin Dreyer.
APRILVERRASSING - SUPERMAN

PUK XV STAAN HUL MAN

Die PUK XV het hul Saterdag 17 Maart bo verwagting goed van hul taak gekwyd teen die Daly Ford vyftiental wat uit 'n hele aantal provinsiale spelers bestaan het.

Die PUK XV het met sewe en dertig punte teen twee en dertig gewen nadat hul

tydens rustyd met agttien punte agter was. Dirk de Vos wat Zillen

Roos vroeg in die wedstryd vervang het, het bewys dat hy bo-gemiddeld fiks is deur twee vol wedstryde te speel. Sy puik uitgee na Michael Carlisle het gesorg vir die eerste drie aan die PUK XV se kant. Michael het altesaam drie drieë gedruk en kan hierdie jaar nog baie vir die PU-rugbyspan beteken. Kobus van Wyk en Louw Venter se goeie samewerking het die tweede drie vir die PUK XV besorg. David Smith (Rhodesië) het getoon dat hy beslis van Springbokgehalte is. Schalk van der Merwe het met sy spoed en fyn taktiek skitterende spel gelewer. André Markgraaf het ook duidelik in die lynstane en skrumms gewys dat hy glad nie vir manne soos Kevin de Klerk terug hoef te staan nie. Thys Lourens was weereens 'n puik kaptein en het bewys dat hy vir nog 'n seisoen van provinsiale rugby reg is.

Uitblinkers aan die Daly Ford se kant was manne soos James Young, Joe Coetzer, Flippie Venter, Gerald Venter en Kevin de Klerk.

Volledige uitslae van die ander wedstryde is soos volg: Ibbies verloor 13-6; Tweede span verloor 28-10; Derde span wen 42-6; o/19 wen 15-14; o/20 A verloor 20-15; die Jongspan verloor 31-0. Al hierdie spanne het teen Weermag gespeel.



André Markgraaf het geensins vir Kevin de Klerk teruggestaan nie.



Dirk de Vos in sy kenmerkende styl.

KORTSPORT

ATLETIEK

Saterdag 24 Maart neem die volgende PU-atlete deel aan die Noord Transvaalse kampioenskap te Pilditch in Pretoria:

Senior mans: Piet Goosen (werpskyf, gewigstoot); Dawie Malan (paalspring); Fanie Camfer (verspring, driesprong).

Senior dames: Isabel Malan (verspring, 100m hekkies); Saartjie de Villiers (skyfwerp); Estie van der Merwe - voorheen Robbertse (spiesgooi); Nanda Barnard (hoogspring); Leonie Smit (400m hekkies); Retha Swart (4 x 100m aflos).

Mans o/21: Adriaan de Lange (1500m); Jan Theron (100m); Willem Gunther (verspring); Willem Coetzee (skyfwerp, gewigstoot). Dames o/20: Viviën Louw (100m); Christine van den Vyver (hoogspring); Christine Bensch (skyfwerp, gewigstoot).

Die volgende PU-atlete is uitgenooi om aan die SAAA-verjaardag atletiek byeenkoms by die Herman Immelman Stadion in Germiston te gaan deelneem: Jurie van der Walt (110m hekkies); Christo Botha en Tommie Ferreira (400m hekkies); Fanie Camfer en Willem Gunther (verspring); Christine Bensch (skyfwerp en gewigstoot); Saartjie de Villiers (skyfwerp). Die byeenkoms vind Maandagaand 26 Maart plaas.

RUGBY

Tydens Saterdag se rugby-dag teen Wits in Johannesburg neem die volgende PU-spanne deel: Die eerste span, die Ibbies, die Bulspan, die Jongspan, die o/20 A span en die o/19 A span.

STOEI

Saterdag 17 Maart is daar Springbokproewe gehou ten einde 'n span te kies wat Suid-Afrika teen Taiwan sal verteenwoordig. Christo Lottering en Danie Bekker het vir Wes-Transvaal deelgeneem. Albei hierdie stoeiers behoort aan die PU-span. Christo (bo 100 kg) en Danie (52-57 kg) het kwaal teenstand gehad en kon nie die Springbokspan haal nie. Christo Lottering het egter derde geëindig in sy afdeling.

GEWIGOPEL

Die PU-gewigoptelklub het Saterdag 17 Maart in Johannesburg aan die Suid-Transvaalse beginners-kompetisie deelgeneem. In Olimpiese stote het Herman de Bruin 'n eerste plek behaal in die ligswaar-afdeling (75-82.5 kg). Leon Labuschagne het in dieselfde afdeling 'n goeie 77 kg opgeraap, maar het ongelukkig met die ruk-en-wip die gewig verloor op 102 kg. Koos Henning van die PUK wat 'n Suid-Afrikaanse 67,5 kg Olimpiese - gewigoptelkampioen is, het tydens die kompetisie 'n demonstrasie gelewer.

Op 31 Maart is daar 'n kompetisie tussen die PU-gewigoptelklub en Wits. Met meer ervare manne soos

Eugene du Plessis, Leon Labuschagne en Renier van Rensburg behoort die PU-span dinge vir Wits moeilik te maak.

MUURBAL

Wedstryde vir die komende week is soos volg: Eerste liga: Woensdag 28 Maart, Pukke vs Weermag (PU-bane)

Tweede liga: Dinsdag 27 Maart, Pukke vs PBHS (PBHS-bane).

Derde liga: Woensdag 28 Maart, Pukke vs College Masters A (PBHS)

Damesliga: Dinsdag 27 Maart, Pukke A vs Vaal Reefs A (Vaal Reefs).

JUDO

Saterdag 10 Maart het PU gekombineer met Noord-Vrystaat 'n oorwinning van 55-10 oor UOVs behaal en gelykop teen RAU geëindig met 26 punte elk. In die individuele kompetisie het die PU-deelnemers baie goed gevaar.

Junior Springbokke Hugo Pienaar (o/60 kg), Johan Boshoff (o/71 kg), Charl Botes (o/78 kg) en Ronell Campher (o/72 kg) het elk goue medaljes ontvang. Renè Rautenbach het 'n silwer medalje in die o/52 kg afdeling ontvang.

Ronell Campher het die trofee vir die dame met die beste tegniek ontvang.

TENNIS

Die PU-tenniskampioenskap het Saterdag 17 Maart begin. Die enigste opwindende van die dag was toe Henry Jacobs (vyfde gekeur) vir Bennie Hattingh met 6-3, 4-6 en 7-5 gewen het. Die volledige uitslae tot dusver is: Derde rondte: Dames enkelspel:

Mariëtte Schoonraad wen Esmé Haylett (6-1, 6-1). Magda Smuts wen Barbara du Busson (6-2, 7-6). Elbé Kruger wen Joana Rautenbach (0-6, 6-2, 6-2).

Mans enkelspel: Henry Jacobs wen Bennie Hattingh (6-3; 3-6, 6-4). Pikkewyn Malan wen Bennie Smith (6-1, 6-0).

SPORTAFRIGTERS

Sportafrigters word benodig vir hulp by Ikageng en Promosa. Daar word veral gesoek na L.O.-studente. Enige persoon wat kan help met die afrigting van atletiek, sokker, krieket, netbal, tennis, korfbal en pluimbal kan Deon Meyer skakel by bussie 7 by die SSR-kantoor.

TAFELTENNIS

Saterdag 17 Maart het die PU - tafeltenniskampioenskap plaasgevind. Twintig mans en twaalf dames het opgedaag. Adré Olivier het die dames enkelspel gewen. Martin Piek het die mans enkelspel gewen. Die mans dubbelspel is deur Martin Piek en Pierre Schmidt gewen. Die Wes-Transvaal liga byeenkoms het ook al begin. Die PU het hul eerste wedstryd teen Brick and Tile van Vereeniging met dertig punte teen vyf gewen. Daar is vanjaar vyf spanne in die liga ingeskryf.



'n Skoon uitgee van Thys Lourens na Kobus van Wyk.

NETBAL GOOI BAL

Daar is vanjaar vir die eerste keer van eksterne keurders gebruik gemaak om die PU-netbalspan te kies.

Die spanne bestaan uit die volgende speelsters: Dole: Rina Papenfus, Louise Wessels, Elsbet van den Heever en Elmarie Taljaard. Verdedigsters: Marlene van Heerden, Marieta van Eeden, Marina Labuschagne en Hettie Venter. Senters: Lynette Smith, Rina Greyling, Leonie Scott, Zena van den Heever,

Adré Olivier en Santie van der Merwe. Die reserwes is Gerda Saunders en Edith Parsons.

Tydens die intervarsities en die Suid-Afrikaanse Universiteite kampioenskap gaan hierdie spanne teen onder andere Kovsies en Maties deelneem.

Die PU-spanne het van-

jaar 'n amptelike afrigter en ook nuwe sportdrag. Daar word ook later vanjaar spreiligte opgerig vir die netbalspeelsters.

Die koshuisspanne is ook vanjaar besonder vroeg al besig om te oefen. Verlede jaar se wenners van die koshuissliga, Heide, sal moet ligloop vir Karlien en Ver-

geet-My-Nie. Klawerhof is ook al hard besig om fiks te word.

Alle koshuisspanne sal Saterdag 31 Maart vir die eerste keer kan kompeteer tydens 'n netbal-toernooi. Die koshuissliga begin eers Saterdag 7 April, dan sal die PU-spanne ook aan hul eerste ligwedstryd deelneem.